

---

## Чекхитойда 1 июлдан эътиборан 270 дан зиёд хўжаликни марказлашган тарзда ичимлик суви билан таъминлаш бошланади

Бағдод туманининг "Чекхитой" маҳалла фуқаролар йиғинида ичимлик сув муаммоси ижобий ҳал этилмоқда. Давлатимиз раҳбарининг ўтган йил 25 октябрдаги "2022-2023 йилларда маҳалла инфратузилмасини янада яхшилаш бўйича қўшимча чора-тадбирлар тўғрисида"ги 408-сонли Қарори мазкур муаммо ечимида асосий омил бўлди.

Лойиҳага кўра, 2 та янги қудуқ қазилиб, сув миноралари, трансформаторлар ва химоявий тўсиқлар ўрнатиш, шунингдек, 3 минг 820 метр масофада тармоқ тортиш назарда тутилган бўлиб, тез орада ҳудуддаги 274 та хўжаликда ичимлик сув билан боғлиқ муаммо батамом ҳал этилади.

- Бу муаммо анчадан бери бизни ўйлантириб келаётган эди, - дейди МФЙ ҳоким ёрдамчиси Нурматжон Ғозиев. - Аввалдан мавжуд биргина қудуқ ва эски тармоқлар ҳам деярли яроқсиз ҳолатга келиб қолганди. Президентимизнинг бу қарори ҳудудимизда инфратузилма билан боғлиқ муаммоларнинг бирин-кетин ижобий ҳал қилинишини таъминламоқда. Аҳолимиз бўлаётган бу ишлардан, янгиланишлардан жуда миннатдор, катта-ю кичик раҳмат айтяпти.

Ҳоким ёрдамчисининг айтишича, маҳаллада ичимлик суви билан таъминланганлик даражаси атиги 20 фоизни ташкил этади. Янги лойиҳа доирасидаги ишлар тўлиқ якунланиб, 1 июлдан аҳолига марказлашган тарзда хизмат кўрсатила бошлангач эса, бу кўрсаткич 80 фоизга етади.

**Бағдод тумани ҳокимлиги Ахборот хизмати.**

2023-06-16 17:06:12